



Sud Bosne i Hercegovine
Суд Босне и Херцеговине

Broj: S1 3 Iž 043305 22 Iž
Sarajevo, 29.07.2022.godine

Sud Bosne i Hercegovine u Sarajevu, u apelacionom vijeću sastavljenom od sudija Mirsade Džindo, kao predsjednika vijeća, Dinke Beslagić-Čovrk i Mirko Božović, kao članova vijeća, odlučujući o žalbi Alić Smaje iz V., ul. ..., izjavljenoj protiv rješenja Centralne izborne komisije Bosne i Hercegovine, broj: 06-1-07-1-61/22 od 14.07.2022.godine, o razrješavanju dužnosti članova Opštinske izborne komisije Vogošća, u nejavnoj sjednici, održanoj dana 29.07.2022. godine, donio je

R J E Š E N J E

Žalba se odbija kao neosnovana.

O b r a z l o ž e n j e

Rješenjem Centralne izborne komisije Bosne i Hercegovine, broj i datum navedeni u uvodu, razrješeni su dužnosti u članstvu Općinske izborne komisije Vogošća 1. Selma Zundža, predsjednica, 2. Smajo Alić, član i Andreja Mehmedović, članica.

Žalitelj je blagovremeno uložio žalbu na navedeno rješenje zbog pogrešno i nepotpuno utvrđenog činjeničnog stanja, grubih povreda postupka, pogrešne primjene materijalnog prava, diskriminacije i povrede odredaba Evropske konvencije o zaštiti ljudskih prava i sloboda.

U žalbi navodi da je odlučna činjenica i razlog usljed kojeg je pobijano rješenje nepravilno i nezakonito propisano odredbom člana 2.15 stav 4 Izbornog zakona kojim je propisano da ukoliko članu izborne komisije ističe mandate u izbornom period, mandate će mu se produžiti do isteka izbornog mandata, odnosno do potvrđivanja rezultata izbora.

Rješenjem o imenovanju tri člana Opštinske izborne komisije Vogošća prema kojoj mandate imenovanim članovima traje sedam godina, ne postoji pravni osnov za razrješenje mandata.

Žalbom se ukazuje da je rješenje Centralne izborne komisije BiH od 14.04.2022. godine kojim je data saglasnost na imenovanje na dužnost člana Opštinske izborne komisije Vogošća u svemu ispoštovana odredba člana 2.14 Izbornog zakona.

Predlaže da se žalba usvoji da se poništi pobijano rješenje i naloži Centralnoj izbornoj komisiji da donese akt- rješenje kojim se potvrđuje već doneseno, pravilno i

zakonito rješenje o imenovanju tri člana Opštinske izborne komisije Vogošća od 31. marta 2022. godine na koje je rješenje CIK dala saglasnost.

U odgovoru na žalbu Centralna izborna komisija Bosne i Hercegovine je predložila da se žalba odbije kao neosnovana.

Ispitujući ožalbenu odluku u okviru žalbenih navoda, vijeće Apelacionog odjeljenja Suda BiH je odlučilo kao u izreci iz sljedećih razloga:

Žalba nije osnovana.

Iz obrazloženja ožalbenog rješenja proizilazi da je po žalbi Sadeta Šopović iz Vogošće, ukinuto rješenje Centralne izborne komisije BiH od 14.04.2022. godine kojim je data saglasnost na rješenje Općinskog vijeća Vogošća od 31. marta 2022. godine o imenovanju na dužnost u članstvu Opštinske izborne komisije Vogoša u sastavu Selma Zunđa, Andreja Mehmedović i Smajo Alić i predmet vraćen Centralnoj izbornoj komisiji na ponovno odlučivanje.

Novim rješenjem od 19.05.2022. godine, u skladu sa uputama Apelacionog vijeća Suda BiH Centralna izborna komisija nije dala saglasnost na rješenje Opštinskog vijeća Vogošća od 28.02.2022. godine za članstvo u izboronoj komisiji u sastavu koji je naprijed naveden.

Nakon toga je zahtijevala od Općinskog vijeća Vogošća aktima od 19.05.2022. godine i 13.06.2022. godine da ponovo izvrši imenovanje tri člana Općinske izborne komisije Vogošća do 20.06.2022. godine.

S obzirom da Općinsko vijeće Vogošća nije izvršilo imenovanje tri člana Općinske izborne komisije Vogošća u roku propisanom odredbom člana 2.15 stav 2 Izbornog zakona BiH, Centralna izborna komisija je nakon uvida u evidencije koje se vode kod CIK BiH utvredila da je Selmi Zunđa, Smaji Aliću i Andreji Mehmedović mandat istekao 19.02.2022. godine iz kojih je razloga je pravilna pobijana odluka kojom je razriješila dužnosti Zunđa Selmu, predsjednicu, Alić Smaju, člana i Mehmedović Andreju, članicu.

Odredbom člana 2.15. stav (2) Izbornog zakona Bosne i Hercegovine („Sl. glasnik BiH“, broj: 23/01,7/02, 9/02, 20/02, 4/04, 25/05, 65/05, 77/05, 11/06, 24/06, 32/07, 37/08, 32/10, 18/13, 7/14 i 31/16) je propisano da ako se ne izvrši imenovanje novog člana općinske izborne komisije u roku od 30 dana, Centralna izborna komisija BiH može izvršiti imenovanje novog člana općinske izborne komisije

Kako u konkretnom slučaju Općinsko vijeće Vogošća nije imenovalo članove Općinske izborne komisije Vogošća, CIK BiH je rješenjem od 14.07.2022. godine do potvrđivanja rezultata Opštih izbora 2022. godine na dužnost zamjenskih članova Opštinskog izborne komisije Vogošća imenovalo Selmu Zunđa, zamjensku predsjednicu, Andreju Mehmedović, zamjensku članicu i Sadetu Šopović, zamjensku članicu.

Iz navedenih razloga prizilazi da se žalbom faktički traži da se održi na snazi odluka Općinskog vijeća Vogošća iz marta 2022. godine koja je ukinuta po odluci Apelacionog vijeća, što znači da ista više ne proizvodi pravno dejstvo iz naprijed navedenih razloga.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

**PREDSJEDNIK VIJEĆA
S U D I J A**

Mirsada Džindo